

皇明留臺奏議

皇明留臺奏議卷之十

用人類

乞及時用才以裨化理疏

郭惟賢

隆慶年
河南道

乞搜遺賢疏

王以通

萬曆年
貴州道

乞議憲臣督屯疏

彭而珩

乞酌議選法疏

陳 燊

萬曆年
四川道

乞慎用撫臣疏

戴 燦

萬曆年
浙江道

乞下考選之命以充任使疏

蕭如松

萬曆年
河南道

乞慎重臣去留以安地方疏

蕭如松

萬曆年
河南道

催用部院請和衷疏

朱吾弼

萬曆年
浙江道

請留重地重臣疏

朱吾弼

萬曆年
浙江道

請補南都大臣疏

孫居相

萬曆年
福建道

請添設南畿學院疏

孫居相

萬曆年
福建道

乞補叅贊總督大臣以安重地疏

蕭如松

萬曆年
河南道

皇明留臺奏議卷之十

內江鶴侶蕭如松

高安密林朱吾弼

南京河南等道監察御史

內鄉黃羽李雲鵠

同輯

沁水拱陽孫居相

司務臨海元初余養蒙編閱

宣城庠生吳伯與同
金谿庠生周文明校

乞及時用才以裨化理疏

郭惟賢

隆慶年任

臣備員南臺伏覩

皇上宵旰求治寤寐英賢起

廢之典無日不下直將羅天下之士空巖穴之良邇
者又從科臣之請將南京卿貳盡行推補卽唐虞
庶明勵翼之風不越於此矣但有屢薦剡負一時
之望天下之所期嚮用而未及用者臣安能以無言
乎臣嘗觀大學傳論平天下之道歸重用人而見不
能舉舉不能先名之曰命則是用人之貴於及時也
故天下非無才之患非才不見用之患用而不及時
之患也譬之烏獲之力一夫能舉重任而騏驥之足

一日可致千里然用之於強壯之日則其力尚奮然
有餘而用之于衰憊之後則其力亦有時而竭今諸
臣之所薦舉者清議首推如原任禮部侍郎王錫爵
猶曰在憂未報闕也餘如原任光祿寺卿賈三近孫
鑰太常寺少卿何源尚寶司卿汪文輝保定巡撫孫
丕揚福建巡撫耿定向貴州巡撫曾同亨吏部郎中
王鑑廣東按察使胡直福建副使蔡國珍雲南副使
劉應峰廣東叅議詹仰庇之數臣者類皆以才品著
稱可肩艱鉅之任而致千里之遠者也彼或以病告

或以憂去或以讒斥退修山林遠者十餘年近者數
年使不及今強健之時而用之臣恐其歲華相催精
神意氣漸就隳頽不將使人才有後時不用之嘆耶
卽云在位不乏人然太平非一士之略舉而不先何
貴於舉伏乞 勅下吏部將賈三近等諸臣及時

遇缺推用庶俊又在官而野無遺賢詩所頌濟濟多
士文王以寧者將于今快覩其盛矣雖然臣猶有說
焉昔之用人者其任之也專其養之也至語曰大臣
不可不敬也是民之表也言貴專任也又曰地之美

者善養禾君之仁者善養士言貴愛養也方今

聖明在御羣工式序臣子當斯時誠千百載一遇矣
而臣區區芹曝之獻尤願皇上知人善任

虛心用賢使輔弼部院之臣皆得盡其所懷直已而
行道 官府上下之間精神脉理相通爲一其有

法未合於

祖制謀未協於僉同事未宐於民精

者乞復

祖宗朝執奏之規許院部諸大臣因事

執奏敷陳利弊

聖明召輔臣商確其是

裁而行之務在法

祖宜民與治同道有都俞而

濟以吁咈有獻可而不廢替否間有愚慙之臣意在
披瀝而昧於將順者尤望 聖慈優容愛惜以培

天下謇諤之氣以示 國家養士之仁毋乍進而乍
退毋旋用而旋斥使諸臣皆欣欣然有所願效而無
憂懼不敢之意如此則股肱喜而 元首起士氣
伸而豪傑奮此尤隆泰交寓鼓舞之要機也惟
聖明加之意焉

乞搜遺賢疏

王以通

萬曆十七年任

臣聞帝王致治惟以親賢爲急務而其立賢則無方是故有弓旌招賢之典焉有鄉舉里選之法焉而又有辟召徵聘以起岩穴之士焉若堯之舉舜湯之聘伊尹皆岩穴而登之廊廟者也輔佐得人政治畢舉時雍風動之化兆民允殖之休於今爲烈有由然矣我國家取士以科目而得人獨盛今秋兩直各省所貢士真彬彬然足充任使矣然我朝祖宗辟召徵聘每科舉間行如太祖高皇帝選

秀才張宗

文皇帝聘吳與弼至京而擬授以官

僚之職蓋爲官擇人而不專倚於科目是以野無遺
賢而士效實用治化之盛真與堯湯並隆矣以臣觀
於今日化理之所甄陶豈無隱逸賢士可以冀贊

皇猷者也

臣

前閱邸報見南京祭酒趙用賢一本爲

申飭監規修明

祖制等事內開請修遺賢拔用

之典據薦江西新城縣舉人鄧元錫安福縣舉人劉
元卿陝西藍田縣舉人王之士三臣學行已詳於趙
用賢之疏章蒙

皇上允其請下吏部覆議該部

臣將王之士當行陝西撫按衙門查果行誼可嘉久
嬰足疾宜遙授師儒之官以示風勵而鄧元錫則欲
其起送吏部銓補劉元卿則欲其起赴禮部會試此
其進賢慎於重始甚遠慮也但臣聞孟軻有云大有
爲之君必有所不召之臣 皇上勵精圖治銳志

稽古邇者與輔臣議斥者貞觀政要進講禮記諸賢
書益卓乎不世之主也士生斯時豈忍高蹈遠引以
爲潔哉故如王之士者足旣患疾授之儒臣可以儀
刑多士矣至於鄧元錫劉元卿未可以爵祿常例引

至也

臣

愚以爲

皇上當取法

祖宗成憲徵

聘隱逸二臣則召入便殿而親試之或質之經術以觀其學或探之匡濟以觀其才或察之動靜語默以觀其操履果有可用則用之以輔導元子可也方

今元子睿齡日增聰明日啓可正與進學之時也

寸陰之惜大禹猶然

臣

見庶民之家積有千金之資

則亟欲聘明經於四方及時以訓誨其子何者蓋蒙養勿端則有浮靡之習時過後學恐有扞格之虞故所以爲之慮甚殷也况元子行將日理萬幾而講

學又不可少緩乎雖其天縱之資不與凡民伍然而
古今之興衰非賢士孰與通其故天心之微隱非賢
士孰與晰其幾四海利病之大原非賢士孰與擴其
聞見君子小人之情狀非賢士又孰與辨洞其真僞
故誠得鄧元錫劉元卿以輔導之則隨時論思因事
啓沃起居出入之間皆聞正言行正道 聖功以

豫而學問將日新 國本以端而國祚將益隆矣所
以衍 宗社無疆之福海宇臣民之望者何以踰此
臣前待罪江西下邑已六年餘知二臣之學行頗詳

茲蒙 皇上拔置畱臺思效涓埃而惟以請

元子之講學者爲甚切故敢不竭忠愚上瀆

天聽如不以_臣言爲枉乞 勅下該部咨行江西

撫按衙門轉行該府縣禮聘三臣入京因其能而授

之職_臣雖愚昧亦得效以人事君之忠矣_臣愚不勝

隕越惶懼之至

議遣憲臣督屯疏

彭而珩

萬曆十八年三月上

頃科臣王繼先建議欲脩舉九邊屯政該戶部覆題奉聖旨各邊屯政久敝屢經建議申飭只是虛

應故事須要着實清查責成經理你部裏還詳究弊源再議停當來說欽此天語諄諄務在懲虛文

責實效我

皇上軫念邊計抑何切也顧屯政載

在令甲炳若日星惟法立而不能守故致有目前之敝茲科臣所議該部所覆抹時敝而圖永利亦旣纚纚具矣卽欲進而求之寧別有奇計哉第治法無

議治人尚有所當議者各邊管屯之官星羅密布

朝廷督屯之

旨三令五申乃

詔令格而不行

職員具而無裨則以奉行

君令而致之所司者

未有專官玩愒廢弛日甚一日此惟在近世則然耳

臣攷宣德五六年節遣兵部侍郎柴車吏部郎中趙

星禮部員外郎吳政等經理各處屯田嘉靖三十九

年遣御史陳旌往陝西甘肅延寧等處溫如章往山

西宣大鴈門等處查理屯田及查

會典嘉靖二十

九年令選風力重臣二員督理沿邊屯牧隆慶二年

有都御史三員之差總之遣廷臣董其事者重之也
宣廟時各邊管屯百執事雖設立而未甚備迨

世廟時則以次大備矣猶然有重臣憲臣之遣豈非
以提綱率屬必須得簡命之臣而後百執事奉

其約束不敢隳厥職乎其時邊土無曠國用不詘

未必非任人之效也承平日久輒以屯爲弁髦督屯
之使庸易報罷此豈計之得耶又何怪乎屯田之日
壞也臣竊謂事之當急莫如九邊官之當用莫如御

史今宜倣嘉靖年間故事選差御史二員分往前定

地方督理屯政揆之事體其便有三焉邊屯弊竇甚于鼠穴撫按官政務旁午未必能一一窮詰之况非履畝查勘恐隱奸未可坐照也得御史拮据而理之自爾振刷風生科臣所謂托爲荒者名爲逃者諸如此類莫能售其奸一便也先大學士楊一清有言附郭屯地每歸于世豪之家屯田軍餘有終歲陪糧而不知屯地之所在者此其弊至今無改也各邊該道未必無任勞任怨欲清理之者而限于事權動見掣肘必也御史奉璽書持三尺以從事則兼併者法之

陪累者甦之二便也昔婁師德屯田豐州身衣皮袴以率先士卒故作事勸功非以身倡之不可也今塞上屯官果有如師德者乎先禮部尚書劉文定之有言管屯爲職者率優游于城市何嘗有阡陌之巡邇來因循之習大都坐此惟御史不時以單車巡行原野閱其土之荒闢以課吏之殿最則羣吏曷敢憚胼胝士卒曷敢舍耒耜耳目所及孰不象指三便也語曰琴瑟不調必解而更張之今諸邊屯政業已極敝敝極則反正當更張之時而憲臣專督一舉三便則

更張之第一義也爲拘攣之見者則以官非額設難其議不知 朝廷設官遣使所以爲 國也採時也苟于 國有裨于時爲急卽自今創設之特遣之未爲不可況率由舊章者哉先年曾革巡關革僣運無何而次第復之則以其終不可少也督屯所係不在巡關僣運之後顧獨可以駢拇視之耶 命官誠便也乃其效非可以旦夕計也則宜需之以久焉請著爲令亦如兩京屯差之限以三年爲期仍令每年終籍報墾田之實數併舉劾屯官之稱職不稱職

差滿之日

廟堂覈其功能則立法庶爲不踈乎

久任誠是也乃其事非可以牽制爲也則便宜可假
焉昔漢用趙充國唐用韓重華皆得以便宜行事故
湟中振武之屯竟成大功今宜彷彿其意任是職者
無務以常格繩之凡利病興革一任展布而惟省其
成則用人庶盡其所長乎屯不可一日而不講則督
之不可一日而無官政成之日勿輒議罷必如是而
後事功無作輟之病 國家享長久之利也伏乞
勅下戶部都察院會議果臣言可采查照前例遣憲

臣二負分督邊屯仍選擇而使至于責成事宜臣言
有未盡者再加議處務求長策則

明旨所謂清

查經理者不患無人虛文可剔實效可期屯政從此
大修額餉從此全復裕 國安邊恒必賴之矣臣不
勝隕越悚慄之至

乞酌議選法疏

陳

炆

萬曆二十五年四月上

臣查得

大明會典凡引選先期將應選等官考試已定查審得實具各官廕子數進入至日早朝已畢吏部官請

旨選官奏各官總數候本經

御覽發出填榜揭示此舊制也未知有以籤選者又查得會典載稱正德七年奏准廣西除方面知府外其餘大小官負職事許本省別府州縣人負相兼選用至嘉靖七年奏准四川邊遠地方東川等處首領屬官許以本省別府人相兼選用此又酌諸

時宜者也未知有以籤選者選之用籤由原任吏部尚書孫丕揚始初意在杜私請而示公道顧其中有
大不便者未暇計也及請 旨允行之後彼亦自

知其窒礙處廼其執性偏拘又不善於調停迨去任而沿及同事之臣見謂奉行久矣遽難議改以傷雅道故有明知非是而聊且仍之者所以宜更而久不更也今 陛下深維銓政久廢務在得人冢宰選司一時 簡用矣此正改絃易轍之會而可復因循已乎 臣請詳其法之不便試爲 陛下言之夫吏

部每雙月大選例也在進士除授有先於試政衙門稽勤惰訪行能者而又兩經過堂以驗其年貌蓋品級雖定而人與地之相當其中當有辨也至於舉貢等項則加堂考以定職銜而就其本銜之中仍酌爲先後次第蓋官銜雖定而人與地之相當亦貴有辨也今付之一籤而已乎則大小職官並有不便者如均是官也有宜簡僻而授以煩冲有堪煩劇而授以偏簡縱不爲地方計亦非所以全器使惜人材也此似與任大責重者尤不便焉故有一履任而輒爲請

調者矣均是官也或南人而處之極北或北人而處之極南無論水土不習卽一官路費稱貸不可得也此似與官卑俸薄者尤不便焉故有膺一命而向人泣訴者矣凡此皆今日用籤與本來選法大相背戾以致多有不便如此故臣謂其法之不經也臣非不知變法之意苦於公道之不能白而假是以濟其勢之窮然若籤之變也不通之甚者而可久乎且臣惟掣籤之法但能行於大選已矣乃若推舉推補改調改除之類其不能用籤者尚多也將盡掣之乎不能

盡掣而欲假是以蓋該部之無私也其誰信之無惑乎議其後者謂籤法雖新猶夫闕缺之故智也闕始於公卒於弊而弊獨免於籤乎哉自古聖王圖治不任法而任人人臣奉公不務名而務實實心秉公卽遵舊制而可以集事可以服人意念少私名爲新法而適以僨事適以滋議然則居銓衡之地者顧其實意何如耳奚事引嫌而以籤爲名况銓衡云者謂其能權宜而善低昂也假令抽籤而可以了事則何必吏部一神祠足矣此甚非

祖宗設官立法之意

陛下動思法祖獨奈何而忽此重務乎恐執此不變
所妨吏治不小也臣故謂其當議也抑臣猶有說焉
選法者用人之具也銓臣者用人之人也曩

陛下久虛銓部堂屬不輕易以與人誠慎之矣夫旣
慎而後用則貴信而勿疑蓋上用疑下亦疑而自沮
上用信下亦自信而任事焉此疑信之間堂陛通塞
之關而世道否泰之機也方今 國家多事須人最
急 陛下誠寄心膂於用人之人而重其事權行
其志願乃專責以知人善任之效彼不竭犬馬以報

國者非夫也此又臣欸欸之愚竊爲 聖明今日

望焉倘臣言不至甚謬 陛下幸採擇之仍乞

勅下吏部查議掣籤之法果否合乎經制協乎時宜
今後大選應否人地相當南北兩便務使行諸今而
無弊傳之後而可遵酌議上 請而該部以實意奉
公行之少有徇私聽該科訪實叅奏庶政本肅清選
法停妥深於吏治有裨而安內攘外各有攸賴矣何
東事之足憂乎臣愚不勝惶悚待 命之至

慎推用撫臣疏

戴

燦

萬曆二十年
二月內上

竊惟撫臣專制一方吏治民生胥賴焉吏治不可一日不振民生不可一日不安則撫臣之在地方誠重矣而在應天根本之地爲急何也三吳之凋敝有年海外之警報叵測及此時而得人振刷之不容一日緩者也而問今日巡撫應天者誰乎李涑已奉

旨回籍矣今調保定宋仕以代李涑又調江西任養心以代宋仕又調操江邵仲祿以代任養心計其遞爲交代之期已需數月之久而茲仲祿已故矣江西

之代又緩矣必江西得代而後保定有人保定有人而後應天可代況其間有山川跋涉之勞而不能無曠日持久之患乎則應天之代不徒以月計而當以歲計矣以今日之應天而寄于今日之李涑不惟涑視地方爲秦越而無任事之心卽地方亦視涑爲贅龐而無趨事之念矣軍伍久缺糧餉久乏戰備久弱俱付之漫不加意萬一卒然有倣胡以應之是重臣可虛而重地可委也可不爲太息哉臣每嘆近日撫臣無故調用朝受

命而夕已渝席未煖而地已

易然在陝西甘肅等處猶曰邊方腹裏才品相遠也
至於保定江西操江諸巡撫非有邊方腹裏之異似
可無更調而直爲此紛紛也人皆駭之夫價不十者
不易貨利不百者不變常以建牙重臣無故而數易
之非所以爲體也既有東奔西馳之煩又多送故迎
新之費非所以爲安也夫立法有常利國爲本從政
有輕宜民爲上一舉而無益於國不便於民非所
以爲計也況乎吏之賢否俗之媿惡非久延訪則不
能知有利當興有害當除非久閱覈則不能定彼撫

臣蒞任未久於地方之利病正在咨求爲政規模始
有次第更方拱手而受成民方拭目以待治而一旦
乃遽奪之以去卽無論之人情有所不順而於爲治
之道亦大甚拂矣此臣之所以日夜捫心爲地方慮
者也伏願 皇上嚴勅調用撫臣刻期赴任不許

私便稽遲以緩 國家之急庶幾應天之代得早一
日地方亦受一日之賜仍 諭當事諸臣今後撫

臣非有甚不得已勿輕議調以爲地方之擾夫當事
之臣豈不知調之非便而顧樂於調者必以諸臣之

才品各有當也爲地方擇人也臣之愚陋則以爲與其調之於旣用之後孰若慎簡用而謀之於始與其用之不當而速調之孰若任之久而責其成功夫國家擢任撫臣而必付公論於廷推誠重之也今則視爲具文矣銓臣僉名出之袖中諸臣畫諾而已名爲廷推而實故事則欲求撫臣之得其人不可得也願皇上更諭部院及科道諸臣今後遇推巡撫許秉直評論商酌才品與地方應否相宜要於其當不可使易逮其受事之後又遲之歲月考其成績

皇明有虞夏書言 月 / 卷之一
不效則治撫臣之罪間有政善民懷者不靳加銜使
地方永賴以無負 聖天子計安元元至意則不

易官常不廢時務而清淨寧一之化可興吏稱其職
民安其業而雍熙太平之風馴可致矣天下生民幸

甚 臣愚幸甚

乞下考選之命以充任使疏

蕭如松

萬曆三十年
正月上

臣惟君人者如天運於上而五行之吏各宣其氣以
成歲功故人臣受命於君各願修其職掌越俎代庖
虞不克塞匪直才力所限要亦事勢之難兼也方今
聖明在宥總攬朝綱行政用人悉由獨斷頃者
大典聿舉恩赦旁流遠邇臣民罔不歡呼鼓舞
于堯天舜日之下泰運之隆真千載而一時矣矧
遺佚在野之臣咸得奉詔起用乃行取諸臣待

補

闕下而不之及

聖意淵微

臣

愚莫能管

窺惟是留臺乏人至極差務兼攝爲難

臣

日與諸臣

之補以爲解任之計翹首白門視待

恩闕下者

望更殷焉

臣稽

祖宗朝以留都爲

開天定

鼎之地設十三道御史以掌道務以備差使額有三

十九員與北臺稱並重後雖稍不符額而每次選補

新舊共計十七八員之外即

臣

於壬辰之冬誤蒙

聖恩簡錄臺末於時濟濟在事者猶有十二員大小

差務人肩其一故

臣

得畢力巡江以竣厥事嗣緣守

制歸田同時御史亦各星散留臺幾於無人臣于己
亥之夏再蒙 聖恩起補南來共事僅四人而今
又去一人矣臣自待罪兼管山東山西陝西貴州四
道印務本年十月蒙 皇上差巡視鳳陽等倉次
年五月又蒙 皇上差兼京營京倉二十九年九
月都察院劄委巡視西北二城夫鳳陽係 陵寢
重地設九衛所官軍以爲衛設各省直錢糧以爲餉
邇年各屬災荒徵解不前非躬省其地責成有司多
方催督不能爲三軍寄命而文移徃返掛號銷批清

完查欠與京倉事務冗集如蝟加以京營之差閱操較射點馬選軍臨倉放糧渡江放賞各有期會尤爲旁午又加以巡城之差平息爭喧禁緝強暴五方之人雜處其間類多奸宄盜情人命無日無之振刷調停更爲紛糾夫臣一人之身耳以一身兼數務日夜靡遑寢食未暇時方料理糧儲而聞馬練兵適當其會何敢獨後旋思經營城務而省方督餉復際其期焉敢緩圖操瞻前顧後之心竭馳東騫西之力始猶勉強撐持久則神情困憊精血耗散頓起怔忡體貌

疋羸痰火日熾且臣父家居見年八十一歲日薄西

山不能啟口告養緣病思親積思益病時雖力疾視

事難勉曠鰥之愆倘異日者廩庾空虛三軍枵腹兵

旅不振疆場多虞巡緝無狀畿民生奸皇上一

一數以責臣將何辭以解哉故不暇自逸臣之分

也臣不敢言勞也不遑將父臣之情也臣不敢言私

也惟不稱厥職以負重任臣之罪也實臣之所大懼

而不容默默也矧臣之兼差俱久報命逾有歲月四

顧旁皇無人可代而同臺兩御史其差繁不下於臣

以 聖明之朝豈果乏才而致令廢事若此臣竊

謂候補諸臣才經百練俊邁千人撫院所薦揚部院

所咨訪其賢數倍於臣臣以具官久妨賢路尤一念

耿耿不自安者臣向來靜以候 命未敢一言輕

瀆乃今年復一年事勢窮蹙萬不得已呼 天而

鳴俾下情上徹 宸聰縱不爲臣子計勞逸亦當

爲政務計舉廢而 蚤斷預圖之矣伏望 皇上

法 祖宗規制官不缺人念庶官職掌事不兼攝

速令吏部列名上 請 欽賜點用以布列於南

北臺省之間如庸病許以請告回籍爲親侍養庶
久役之臣稍得息肩新補之臣協力抒悃在位在野
靡不感奮治人治法聿見修明億萬年長治久
安之休端在是矣臣不任激切顙望待命之至

乞慎重臣去留以安地方疏

蕭如松

萬曆三十年
六月上

竊惟江北鳳泗

陵寢在焉徐淮之間姦雄所窺

爲東南要害漕儲所運爲西北咽喉實稱重地而撫

臣握兵坐鎮控要害而扼咽喉永奠國家億萬年

發祥之基實稱重臣故重臣一身去留關重地一方

治亂矧其人才望夙隆輿情共協則又不可輕去之

使賢者遂其高蒼赤矢所倚也

臣等待罪留臺奉

命巡視倉屯江務共有地方之責五月內接邸報鳳

陽巡撫李三才一本微臣自劾待斥按臣堅意謬推
懇乞 聖明亟 賜廷議以濟河漕事奉

聖旨李三才旣推托着他去罷員缺即便另推來用
吏部知道欽此臣等相顧錯愕隨見漕臣崔邦亮按
臣李思孝塩臣蔣以化三御史相繼具 奏而在
朝科道之臣復交章有言矣言者連篇悉蒙

中格 臣等誼難緘默不得不爲 皇上請焉夫

皇上之去三才非以推托乎推托之臣不利于地方
地方人所同願其去者也使三才而果其人去之誰

曰不宜而三才則實心肩事衆所信用從育推曰
指不多屈者以實心肩事得推托之名 聖衷淵

微非管窺所能及矣

臣

等習見三才其品孤騫其才

卓犖其氣剛正其心真誠惠澤足起疲癯威令足懾
姦宄精神力量足投艱大而應糾紛自其撫鎮以來
諸凡彰善癉惡興利除害不避嫌不避怨不避勞苦
其心一主于任試讀在前建白諸䟽論礦稅論姦逆
論財用所由耗論治亂所由基侃侃數萬言忠誠愷
切毫無回護匪獨以去就爭至以生死決推托之臣

有是乎頃因河流潰壅阻漕灌

陵三才矢心竭

智崇論竑議抵掌與巡漕御史崔邦亮極譚平成石
畫邦亮深嘉篤信而薦用之三才遂有按臣謬推乞
賜廷議之疏其心蓋謂爲國論治臣子分也會推
任官朝廷事也若因其言而薦其人則言以干進
于義未可且時方與稅監陳增齟齬自劾待斥而又
求治河無以明心跡故自鳴于皇上見進禮退

義欲爲大臣以道事君不可則止云耳初非

簡命及之而畏難固遜也不謂偶觸

宸嚴頓以

推托目之使三才得釋重負縱忠臣去國不忘其君
江湖懷廊廟之憂而自此閑閑桑畝儘有餘適
三才固安心聽去矣惟是正直弗庸儉壬思逞自三
才杜門候代諸所懷姦之人揚揚復出若狐兔幸虎
豹離山而漸肆吞噬無論陳增程守訓輩益肆咆哮
橫行歛怨即各監素稱安靜者亦不免惑于左右以
致居者行者受毒不少法紀蕩然靡所隄防適留守
司副留守韓有光以被論逞忿輒敢毆傷知府金時
舒兇暴之狀同於寇亂罔所顧忌地方事勢忽至于

此可爲寒心故江北士民見三才聽去有日皇皇無
依若赤子之失慈母極其啼號千百爲羣不遠千里
乞哀在事諸臣望其保留撫此重地且也淮北徐南
異常水災田成巨浸窮苦萬狀草澤中逆惡盜黨寔
繁有徒乘間伺隙斬木揭竿鼓怨誹無知之衆借礦
稅播惡之名思以一朝發難禍變叵測若三才一去
彈壓失人是撤東南之保障增西北之隱憂萬萬不
可者况人才之生不數一代之才原以供一代之用
以此異等而去之草野寧不爲天地生才惜哉故以

陵寢關係而言不可不留之以安重地以時事多艱
而言不可不留之以共治理以才望夙著而言不可
不留之以盡所長以人心公議而言不可不留之以
孚衆志總之 皇上自爲封疆計而非徒爲三才

計去留已也倘非重地重臣有關治亂休戚臣等方

鄙小人貪位固寵方嘉君子難進易退祇區區爲人

一官爭去留不從旁成就三才爲君子而甘效小人

附和俗態非夫矣是以躊躇候 旨不下而有此

言所言無能加于諸臣而實非得已也伏乞

皇上仍查按差諸臣及科臣曹于汴臺臣袁九臯史
學遷等諸疏則知諸臣所以惓惓于重臣之留者爲
重地也爲天下國家也特賜諭令李三才照舊
供職盡展其才庶災黎更生群兇落魄其于治安非
小補矣地方幸甚臣等無任激切待命之至

備用部院請和衷疏

朱吾弼

臣攷之都兪吁咈之朝事必備官師師濟濟而世躋
昇平猜忌傾險之朝官多兼事滄滄訛訛而國因危
亂振古不忒若影響然故英君詎辟不愛爵祿以收
豪傑而賢佐良臣每忘恩怨以圖治安上慕師濟之
盛軌下醜滄訛之澆風臣於今日不能無深慨焉今
之日何日也 皇上仁孝疎於 郊

廟惕勵弛於

朝講土木興於

宮苑蓁蕪滿

於

殿陛群小肆於中外正士錮於囹圄閭閻掃

於礦稅郵傳疲於推挽流亡驅於旱澇郡縣艱於支
撐草澤多攘臂而生心冠裳胥感額而短氣閣輔不
得効焚詔補牘之忠臺諫無從致折檻引裾之直歷
稽史冊治平之時鮮有景象至於斯者迺災變之疊
見若異若常不爲殃悖逆之迭出輒起輒滅不爲害
此無他故特以 祖宗之德澤淪浹旣深

祖宗之法度嚴密難犯 皇上獨神其斷有莫測
之恩威臣下各守其官無不供之職業耳第彼守其
官者寧以身庇民不敢戕民以愛身寧以官明職不

敢溺職以戀官寧蹇蹇謬謬以獲罪於

皇上不敢唯唯諾諾以取譏於當時豈其欲惡非人情哉亦惟 國家有 大計典不可逃賢士大夫有公議論不可干於是人用凜凜 祖制京官伍年

一考察茲萬曆三十二年倣古三歲計群吏而弊之正考察外官期也令甲凡不肖者各省直撫按糾之兩京科道又糾之吏部都察院合以吏科河南道之公評而軒輊降黜之吏部主之者尚書叅其議者則左右侍郎也都察院主之者左都御史叅其議者則

副僉都御史也尚書李戴方被劾

請告重於自

爲避怨左都御史溫純又剛直寡和難於獨任秉公
避怨重而左右無分其責者勢不得不模稜了事秉
公難而副僉無贊其決者勢不得不遷就因人一模
稜了事一遷就因人將毀譽出於愛憎是非必不公
將毀最淆於是非勸懲何所示究也以幽明之公典
快好惡之私情卽世號太平猶懼官評倒置民患縱
橫矧民患縱橫而官評倒置是不能拯民于水火且
益之焚溺矣臣謂吏部左右侍郎都察院副僉都御

史當此 大計時決不可無人者故曰 大計關繫
匪輕大臣委任難闕寔喫緊時事臣非無故而發喟
然之嘆矣邇以 楚王一事諸臣見旣杌鑿意遂矛
盾詎知或叅輿論或據習聞或持大體或泥疑心總
非恩讎之私要不失爲君子如閣臣沈一貫及諸臣
所云然者叅輿論而持大體默契 皇上之神斷
天下誰不是之而部臣郭正域則以楚人習聞楚語
自武岡王媒孽以來凡楚人惑楚語者十而九匪直
一正域矣正域疑心生於習聞固執有之必無他腸

獨怪正域任真太過以楚城之人遇 楚王之事例
應迴避既不能先事別嫌復因人言急於自明至發
楚王之壽金其淺之乎爲量宜來衆口之哓哓併累
閣臣沈鯉又累部臣李廷機夫非正域此舉不厭人
心哉要之玉不爲石瑕不掩瑜就楚事論正域在正
域終難文過飾非而正域之生平居已峻疾惡嚴臣
與同官 留都頗服其門無私謁行有師模迨轉北
而署秩宗議謚法正文體攻異教種種犯人所忌毅
然不顧不可謂非端人故沈鯉李廷機重其人而過

信之

聖明在宥碩彥在列

朝固多賢良方正

若鯉若廷機若正域或未必能先之倘宏其識量竟其才志安得以一青輕訾正域耶

臣

謂以楚議言去

者皆

皇上社稷臣不可不惜才爲

社稷計令之各安位而行志也况元輔一貫荷阿衡之眷任次輔鯉蒙東山之

特起礦稅之使未停

縲紲之臣未釋

國事日非民生日促此乾坤何等

時也爲二輔者所宜旦暮皇皇如恥吾

君不爲堯舜恥吾身不爲伊周同三輔朱賡合誠以

感動多方以幹旋斯不負

皇上斯不負所學今

袞闕百不補一忍遽言去耶昔齊景公以梁丘據爲和而晏子以和者五味相濟五音相成病梁丘據之同也非和也故上殿相爭如虎下殿不失和氣者傳爲美談爲國家而忘私讎者卒來負荆之請臣方以都兪吁咈之隆望之

皇上豈諸臣肯出數子下

耶然必

皇上盡加

溫慰使之同出供職毋

襲近時託疾之故套務追上世揖讓之休風各捐私忿共矢忠貞不責人以梁丘據之同而以下殿不失

和氣爲國忘私負荆請罪者是法乃可耳不然猜忌
一生傾險必至君子分黨小人交構一時師濟之美
傳爲滄訛流毒於國可勝道哉臣以年來

天聽日遠疏多留中每慚戇率徒彰

主過無益治機類於葉蟬久矣顧天變人離已極世
情局面已非終不能違心結舌以負

皇上敢復遠怨而怵禍耶臣是以冒昧懇

請伏乞皇上悼國步之孔艱憫世風之漸薄

重乎計典先之和衷亟以旨促李戴會同九卿

科道公推吏部左右侍郎都察院副僉都御史隨
賜點用佐戴與純協恭秉正以完考察又以

旨促輔臣早出閣辦事正域毋更言去同廷機進部
供職庶諸臣之猜忌釋雅道全而治平可坐致也不
然人人以去爲快不以留爲樂舉

朝註籍時當入觀班行落落如晨星胡可令衆庶見
耶此 明示諸臣釋嫌和衷各出供職以共襄上
理者又 臣所惓惓也 臣愚靡所短長僅爲

國爲民一念真切樸忠所激忌諱頃忘所恃

主聖臣直生死進退漚露跡之遑他恤耶臣無任隕
越皇恐待命之至

請留重地重臣疏

朱吾弼

竊謂古之帝王不愛異數殊寵以收賢豪而古之賢豪必欲進禮退義以敦風節蓋不如是不足與有爲也臣等待罪留臺奉差屯倉江上者與鳳陽巡撫右僉都御史李三才已四年共事地方而秣陵去淮陰盈盈一水其忠直端亮家視國子視民焦勞拮据不遺心力若置恩怨榮辱生死於度外又人人耳目之有臣如三才真所稱社稷臣惟社稷安則悅不安則不悅者矣皇上自爲社稷

計或偶中群小先入之言不快其憂危謹論故陽去
之陰留之將顛倒豪傑而盡其用 聖衷淵邃非

庸愚所能仰窺其時_臣等曾繼按臣李思孝蔣以化

及北科道諸臣懇 請候 命_臣等日以匡襄

望閣臣之不靳補牘日以職掌望銓臣之不憚叩

閤今且兩更歲月三才竟不蒙 旨加職懃留又

無人得代以去類於羝羊觸藩狼之跋胡蹇尾矣雖

三才真品真忠實心實政無一念不汲汲無一事不

皇皇未嘗以 皇上去留二心乃開府大臣所云

推轂而遣專閫而聽文武是憲軍民具瞻者名不占
銓曹之尺籍祿不享司庾之石儲縱三才浮雲富貴
敬事後食於

皇上之敬大臣謂何昔范叔上昭
王書曰臣聞明主立政有功者不得不賞有能者不
得不官勞大者其祿厚功多者其爵尊能治國者其
官大故無能者不敢當職有能者亦不得隱蔽使
以臣之言爲可願行而益利其道以臣之言爲不可
久留臣無爲也正三才今日之謂也鳳泗爲

二陵根本重地莫輩之非三才不可中使爲數郡生

靈醜毒譖齊之非三才不可河作爲崇漕邇多虞草澤謀逆浮屠聚奸間井滿目憂愁倭奴有心窺伺計利害緩急而隨時整頓消弭之又皆非三才不可三才爲 皇上莫輦調劑整頓消弭一切能人所不能屹然東南長城卓然中外端表勞不爲不大功不爲不多治衆不爲不能則祿之爵之官之極其富厚尊顯以一三才風勵天下之爲三才者正宜首加恩禮奚而實用之名舍之令三才進不得據用行之樂退不得遂舍藏之高耶此三才所以 請去不

一而足固自重宜爾亦爲

朝廷重地方爲地方

重重臣耳

臣

等近閱邸報所據祖廣才出首獲妖人

鄭才之子鄭國柱又供有鳳陽等處爲佛頭薛真王
臣等總領一百餘會約萬餘人得非趙古元輩孽黨
乎戎心叵測乘間伺隙不敢竊發者未必非三才顯
制潛杜力也誰謂淮上坐鎮可一日無三才耶語云
任賢勿疑又云疑人勿用臣等亦知 皇上之賢
三才任之用之無纖芥疑者惟 君之使臣有禮
臣之自處有義古昔盛時上下相成禮通於去留義

嚴於出處

皇上誠爲重地果不能去三才則當

以禮強之留而三才義不得更言去如

宸衷終

不欲留三才則當以禮聽之去而三才義難於苟爲
留庶用則行舍則藏在三才出處有據使人知

皇上大有爲之作用非常而親賢任能終不以讒間
蚤有譽於天下豈不休哉臣等共叨言責不容坐視
溺職上爲國體下爲地方盡欲爲

皇上求治

安冒昧竭誠以

請原非敢爲三才私者伏乞

皇上俯念重地得人惟艱重臣去留匪輕

勅下吏部卽將三才通論資俸增秩進階特加

溫慰照舊安心供職紓

皇上南顧之憂則地方幸甚臣等幸甚臣等無任隕

越待 命之至

請補南都大臣疏

孫居相

萬曆三十二年十月十一日

臣惟張官置輔者宰世之具也控要扼衝者保治之
謨也故明主不以神聖而廢股肱之佐盛世不以泰
寧而忘根本之憂古之帝王所以久安長治而無土
崩瓦解之禍者凡以加意官僚之任而能制輕重之
勢也乃今所稱地之最重而重臣最不可缺者孰有
過于留都者乎蓋當我太祖之起淮甸也首
議取金陵而其時陶安贊之曰龍盤虎踞此帝王之
都也據以臨天下何向不克太祖如其言竟由

此肇萬世之業豈非以地跨中原及連數省防江備海誠握其要則天下可不勞而定哉我 成祖再

造區宇定鼎 燕京至于設官置吏南與北未嘗不

相埒夫以 成祖之睿聖豈不知省官之爲便而

必不省者誠見夫 祖宗之 陵寢在焉一

國家之咽喉係焉非衆建庶官則不足以控制遐方

彈壓重地耳我 皇上初登大寶虛懷任人大小

相維南北並重維時庶政修舉海內乂安治幾與一

二祖比隆濟美矣邇年以來嗜好少偏登用弗廣以

猜疑成壅滯以壅滯成廢格在

皇上方謂慎于

用人在諸臣亦且澹于用世或缺而不補或補而不來或來而輒去有一署缺至數官者有一官缺至數年者凡官皆然大臣尤甚兩京皆然南京尤甚以南京大臣之缺而歷數之如吏部缺矣總督倉場缺矣禮部缺矣兵部缺矣工部缺矣都察院掌院缺矣通政使缺矣大理寺正卿缺矣即其間有一二已點已任者又屢辭未至久歸未旋矣夫吏部缺則統百官者爲誰總倉缺則理軍儲者爲誰禮部缺則司典禮

者爲誰兵部缺則詰戎兵者爲誰工部缺則富邦土
者爲誰都察院都御史缺則掌風紀者爲誰通政使
缺則達幽隱者爲誰大理寺正卿缺則評冤抑者爲
誰優游家園者尚抵任之無期遷延不補者又懸缺
而廢事徒使一戶部尚書張孟男也旣管本部矣又
管倉場矣又管吏部禮部矣一刑部侍郎王基也旣
管本部矣又管兵部工部矣一操江僉都御史耿定
力也旣管操江矣又管都察院矣大理寺矣夫設官
分職各有司存

聖明之朝原不乏士今乃使一

官而兼數官一人而攝數篆縱使諸臣之才力固足以勝之然事非專制官屬代庖能保人心之不玩政事之不弛乎況今採榷之擾遍及閭閻稅契之議洵洵未息農夫怨于野商賈怨于途生民之顯禍

國家之隱憂真有不可勝言者儻有陳勝吳廣之徒乘積玩積怨之民心因而鼓煽其間而傑黠者誘之脇衆以窺茲土臣恐二三大臣顧東則遺西支左則

漏右 祖宗二百年創業之地亦大可爲寒心矣

昔寧庶人南昌造變意在直搗 金陵然竟趲起

安慶而不敢下者非當時南京兵部尚書喬宇威名
智略有以奪其氣而屈其謀哉由此言之 留都之
大臣胡可忽也胡可缺也且也任用大臣非但用才
亦以養才蓋其素所豎立表見者習熟於 人主

之耳目一有軍國緩急簡而補之如探囊而取挈券
而求無不如意不然無事而忽之有事而求之不亦
難乎我 皇上誠爲養才計爲 根本計爲

祖宗之 陵寢 宮闕計則夢卜延訪正惟其時

烏得視 留都爲賸地視大臣爲贅員顧乃寘而不

念哉臣新入陪京值大僚多缺其蕭條寥落之狀不忍見聞故首言及之伏惟皇上穆然深思逃然遠覽審輕重之勢察安危之源勅下吏部令已點用者速來到任未推補者速爲推補其托故久歸未旋者勒令嚴限復職庶在位有師師濟濟之風而國家享磐石苞桑之固矣留都幸甚宗社幸甚臣不勝悚息待命之至

請添設南畿學院疏 孫居相

臣惟國家設學校爲人才所自出之地而憲臣董學政尤人才所培養之樞至於畿輔學校與他方不同往例必會推御史之堪任者提衡其間誠重之也第按部勤非特校藝密而士行且由之日敦按部踈非特校藝弛而士行且由之日敝近日禮臣建議欲督學使者歲考一周毋得類考良有深意南畿爲聖祖開基教澤首善其人文視各省爲獨盛先是學臣必兩載始歲考一周時迫賓興輒草草以

類考結局儻到任稍遲又或有陞遷事故卽類考不能完勢不得不借先任學臣一二年前考案以塞責以故有一郡六七年未經歲考者亡論力學青衿靡以自見卽功令踈闊士風日流動恣淫蕩習成浮靡攘臂公庭把持曲直規造蜚語淆恩是非甚至聚衆而效號澤脫巾之舉者流敝至此世道之憂也今雖日勤考校猶慮無以甄別人才整頓士習顧學臣自楊宏科任甫期年請告後今歲適當大比而黃陞又且以憂去矣士心皇皇莫知嚮往及今不爲酌議恐

國家雖有一歲一考之令而南畿或迫於時之有限或阻於勢之難周此必不可得之數也臣謬謂今日爲權宜計則有按臣分校之說爲永遠計則有添設學臣之說何謂按臣分校蓋目下去秋闈僅半年耳當此臺臣寥寥若他省改遣時日固不給卽將見在南畿按臣改爲督學朝拜命而夕視事半年之間欲其將黃御史未考之十府四州而遍試之亦難矣合無暫令三按臣分校所轄士則身不出封域而歲校可周科場不悞計莫便於此者何謂添設學臣

蓋按臣行部有察吏慮因諸務與學臣一意校閱者
不同茲議分校亦目前應卒之權先年淮揚巡按曾
帶理學政旋即議罷爲其不專故耳 南畿地方遼

闊人才濟濟難泥常格合無添設一學臣分搭管理
一管應安廬鳳徽寧池太徐和順德一管蘇松常鎮

淮揚徐州各學政俾之分馳校閱歲一告完則考課

旣勤稽行亦密庶文教振興而士風大有裨益乎儻

謂增一差則增一差之費添設學臣未可輕議臣則

謂南畿人文雖盛乃吏事僅可當大省之二或將

三按臣損一爲督學其地方各照前議分轄是一更
置間吏治無損於前士習更新於後亦一議也若以
撫臣參差未便則一按臣與兩撫臣共事者如順天
如宣大比比皆是何獨至於南畿而疑之乎臣待
罪留臺謬有建白之司祇役南畿兼膺地方之責
目睹時事諮之輿論皆以學臣添設爲便不敢不竭
其愚以備聖明採擇伏乞勅下部院再爲
酌義萬一臣言可採亟爲覆請施行臣無任屏
息待命之至

乞補叅贊總督大臣以安重地疏

蕭如松

三十三年九月上

臣待罪留臺奉

命巡視鳳陽等倉隨因京營京

倉乏人復蒙

聖恩委

臣

帶管

臣

竭力蕪攝蓋逾

五年于茲每思

國家大政在兵與食凡營倉當行

條款當革弊端

臣

與科部諸

臣

隨事整飭罔敢弛廢

臣

今得代而在事與接管者固能行之

臣

不敢瑣瑣

以瀆

聖聽顧

臣

所慮者不在治法而在治人不

在諸司之乏人而在大寮之未脩則叅贊機務與總

督糧儲兩大臣所關管伍倉場匪輕也可聽其久缺而不爲 皇上言之乎夫 留都爲 聖祖開

天定鼎之地鍾山龍蟠石城虎踞長江天塹 王

氣所鍾 宗廟 陵寢在焉誠 根本要區與

燕都並重也者 令甲設錦衣旗手等五十二

衛所官軍以脩環衛卽選各衛兵勇分爲大小 神

機等營隨時操練非以壯 國家之神氣乎而總攬

兵權則于兵部尚書寄之奚又設錦衣旗手等三十

餘倉以儲軍需歲責額派正供于浙直江廣等省依

時轉輸非以固 國家之元氣乎而總督糧儲則于
戶部侍郎寄之矣邇者六部多屬代攝九列半空南
京則落落如晨星然兵部缺叅贊數易春秋屢經會
推未荷 俞允戶部缺總督雖曾一補不得其人
隨已去位故年來三軍大閱登壇無尚書而代庖者
任匪專責人有玩心卽內外守備各自爲政兵權罔
所屬矣事關機務誰其任叅贊耶各省運餉臨倉無
侍郎而越俎者未奉專 勅終難責成卽省直額
糧多有逋負催檄罔所行矣倉廩虛實誰其任綜覈

耶故臣與科臣巡視京營在巡營務之張與弛也叅
贊缺而控制無籍不能不爲寒心臣之巡視京倉在
巡倉場之利與弊也總督缺而會計無資不能不爲
扼腕且都城五方雜居奸宄潛伏不時窺伺已多隱
憂而民間苦礦稅之橫征迫饑寒之無賴在在思亂
求逞故今南直隸各屬地方或報天變或報民災絡
繹不絕占者謂兵荒之兆亂萌已形倘有不軌之徒
乘隙倡亂揭竿而起搖惑人心震驚陵寢竊恐
居常責任無屬臨時緩急奚裨欲整兵而叅贊無人

難望運籌決勝欲餽餉而總督無人必至枵腹脫巾
其爲地方之禍可勝道哉夫事變未至而先言之見
謂其迂變至而言言之晚矣臣固不忍以未至之變
哓哓于太平無事之時而禍機可虞計慮宜蚤故雖
已釋負猶抱杞憂不能不望 皇上加意用人以
爲重地計也况 聖主當陽賢才迭出在 朝在
野儘足備 皇上選擇奈何艱于一點而使官之
缺乏 國之空虛如 今日乎哉伏乞 勅下吏部
將前後會推叅贊總督諸臣列名上 請亟 賜點

用二員使之刻期蒞任以握軍國大計以壯根本
重地庶幾人存政舉不憂營倉之廢弛食足兵強永
保金湯之鞏固奚地方幸甚臣愚幸甚